

# Per la giuventetgna da plis pajais

La Scola auta teologica da Sárospatak (Ungaria)

DA GUIU SOBIELA-CAANITZ

■ **La regenza da l'Ungaria ha mess en embarass populaziuns da pajais limitrofs cun far amogna da sia naziunalitad a glied da linguatg ungarais en lezs pajais. La Slovachia ha reagì smanatschond da stgassar sia atgna naziunalitad tar quellas vischinas e quels vischins che gughegiassan d'acquistar ina segunda senza bandunar il pajais.** Tge far lur en Slovachia cun in passaport ungarais? La Rumunia perencunter lascha valair lezza «generusadad» ungaraisa, perquai ch'er ella regala gugent sia naziunalitad a Rumens da Moldova che giavischan in passaport da l'Uniun europeica (UE). Ma i n'ha mai dà in exodus da l'etnia ungaraisa da Rumunia vers l'Ungaria sco quel dals germanofons da Banat e Transilvania vers la Germania. En parts da Rumunia, Slovachia e cunzunt da l'Ucraina fa la populaziun da linguatg ungarais part da la Baselgia evangelica reformada ed è pia dublamain minoritaria; en l'Ungaria dumbra la Baselgia catolica 55% da la populaziun, encunter mo 16% per la «confessiun helvetica». La convivenza d'ina minoritad protestanta en pajais da maioritad cristiana ortodoxa è generalmain pli leva ch'en pajais da tradiziun statala catolica; l'Ungaria n'è pia betg uschè attractiva per populaziun da cretta reformada. La Scola auta teologica («Református Kollégium» [sic!]) da Sárospatak, center academic dal protestantissim ungarais, è situada amez la terra da vignas da Tokaj-Hegyalja, a 15 km dal cunfin slovac; ella è averta a la giuventetgna da l'Ungaria sco er a quella da linguatg ungarais ord ils pajais limitrofs, cunzunt dal district ucranais d'Usch-Horod/Ungvár a sid da las Carpatas. Questa strivla da passa 1 milliun olmas, situada tranter Rumunia, Ungaria e Slovachia, numnav'ins pli baud «Ruthénie» en il franzos dals diplomats; il geograf genevrin Aldo Dami (1898–1977) l'ha deditgà 1940 sia lavur da docter, preschentada a l'Universitad da Debrecen (Ungaria) cur che la regiun fascheva part da l'Ungaria. 1951 ha il reschim communist serrà il «Kollégium» da Sárospatak. La vieuta da 1989–1990 ha pussibilità da l'avrir pupè; era la Baselgia reformada slovac ha avert in'atgna scola auta a Komárom/Komárom sper il Danubi. Ina tala na datti en l'Ucraina anc adina betg; perquai studegia ina gruppua ucranaisa da 21 a Sárospatak. I s'enclegia che l'instrucziun resguarda spezialmain la situaziun minoritaria da las baselgias reformadas en l'Ungaria, l'Ucraina, la Rumunia e la Serbia, sco era la greva situaziun sociala e culturala dals Romas en tut lezs pajais. L'anteriu decan István Györi ha gist publitgà in artitgel en la revista «G2W» (Turitg) davart lezza scola auta vairamain internaziunala\*; i suonda ina resumaziun.

## Studis variads per ina Baselgia da minoritad

«L'andament dals studis da teologia cuzza diesch semesters; (...) tiers vegn in onn da praticum per pinar a l'uffizi parochial (...). Var 90% da las studentas e dals students da pli baud lavuran anc adina en differents posts da la Baselgia, ils bliers en in uffizi parochial, ma plis han chattà in'otra sfida; in per exempel lavura dapi diesch onns en las pravendas ungaraisas da l'Australia, ina predigtanta presta lavur pastorala en piazza cumplaina tar Romas, plis instrueschan religiun» (p. 28). Dapi 2005 posseda la scola auters dus andaments da studis da mintgin trais onns, la pedagogia religiusa e l'assistenza pastorala. La pedagogia religiusa drizza a tgi che vul instruir religiun u lavurar en scolas manadas da la Baselgia. Per l'assistenza pastorala studeg'ins cunzunt en curs per corrispondenza; quai vala spezialmain per quella giuventetgna che viva en l'Ucraina. «Dapi 2010 datti anc in program da 'bachelor' per 'community organizers'. L'emprim vegn ina savida fundamentala davart Baselgia e teologia, lura dapli davart cultura, vita publica e dumondas socialas. Per l'emprima annada è 38 s'annunziads. Purschidas vegnan t.a. las spezialitads art sacral, musica sacrala ed integraziun dals Romas; cunzunt la davosa ha success (...). La scola cooperescha cun pliras autras. Il 'Coetus theologorum' è ina cumianza da lavur dals professers da tuttas

scolas pedagogicas da linguatg ungarais; ina u l'otra envida tschellas mintga stad ad ina scuntrada. Plinavant datti il Di da las facultads teologicas en l'Europa dal sidost, (...) era cun las facultads luteranas da Budapest, Vienna e Bratislava/Pozsony sco er omaduas facultads evangelicas da Praha. Il 'Kollégium' fa era part dal program europeic «Erasmus»; lez promovava il barat da giuventetgna e magistraglia. En ils davos onns ha Sárospatak pia cooperà cun Cluj-Napoca/Kolozsvár ed Oradea/Nagyvárad en Rumunia, Kampen en ils Pajais bass e Tessalonic en Grezia (...). Plevon C. Mambo da la Baselgia reformada da Malawi, sco emprim student african, è vegni a Sárospatak cun in stipendi per in studi da cumplettaziun da dus onns. Il stadi reconuscha il 'Kollégium' ed al conceda ils medems meds finansials sco a las scolas statalas. Quai munta ch'el surpiglia ina part dals custs da studi per in tschert dumber semesters (...). Dentant na fa l'Ucraina betg part da l'UE; sias vischinas e ses vischins èn pia exclus da tscherts meds finansials. Las grondas differenzas da paja impedeschan famiglias e vischnancas ucranaisas da finanzia studis a Sárospatak. Perquai ha il 'Kollégium' drizzà in fond spezial da stipendis che vegn alimentà mo da donaziuns (...); las principalas en ils davos dus onns ha fatg l'institut 'G2W' da Turitg. Uschia han bieras studentas e bliers students da l'Ucraina pudì studegiar a Sárospatak.»

## Sut las rodas dal svilup

La giuventetgna che frequenta il «Kollégium» fa pia part da la minoritad reformada en l'Ungaria ed en pajais limitrofs. Ina da sias grondas sfidas suenter ils studis pertutga la pastoraziun e l'integraziun d'in'otra minoritad, ils Romas; dalonder il success da la scolaziun relativa ch'il «Kollégium» porscha. Cun la vieuta da 1989–1990 èn ils pli flavelvs, savens pia ils Romas, vegnids sut las rodas dal svilup. Györi: «Oz datti bliers vitgs senza infrastruttura u instituziun publica, sco scola, posta u post social, ma cun in'auta proporziun da Romas. La Baselgia è savens l'unica instituziun sociala. La Baselgia reformada fa gia part da plis projects per gidar ils Romas en talas situaziuns, per exempel cussegliand geniturs davart l'igiene e la spaisa, mussond l'orticultura per sa nutrir sez, gidond ils uffants cun instrucziun supplementara, (...) savens era endrizzond duschas e pastrigns» (p. 29). Tgi che studegia a Sárospatak vegn pia per regla a parter las difficultads da mintga di d'ina societad che n'ha anc ditg betg cuntanschi noss level da bainstar. Ma gist qua po la Bibla gidar: «La cretta è morta, sch'ella n'è betg campagnada d'ovras» (Giatgen 2: 17).

\* István Györi, Die Reformierte Theologische Akademie in Sárospatak. En: «G2W», 6/2011, pp. 28–29. Addressa: Birmensdorferstr. 52, Postfach 9329, 8036 Turitg. Fax 043 322 22 40. Posta electronica: g2w.sui@bluewin.ch. Internet: www.g2w.eu